

Le livre des serfs de Marmoutier, Appendix, Nr. 27

Nosse debebitis si qui eritis posteri nostri. Majoris scilicet hujus habitatores Monasterii Sancti Martini, Girardum filium Herberti de Balgenciaco calumniam intulisse nobis ex parte uxoris suae nomine Adeladis, filiae Landrici Balbi, super rebus servorum quondam nostrorum Ohelmi et filii ejus Ascelini, propter Hilduciam, Ascelini matrem, uxorem Ohelmi, quae fuerat quidem Herbaldi avi jamdictae Adeladis ancilla, a Rotberto Blesenci vicecomite illi donata, sed ab ipso postea Herbaldo, annuente eodem vicecomite Rotberto libera facta; ac deinceps, cum Rotberti et Herbaldi filiis calumniam ipsam emovere temptantibus judiciis publicis et congruis concordationibus, nostra jam olim erat contentio complacata. Cumque nos et iste Girardus ob eandem diutius calumniam fatigasset; ac tandem bellum, a nobis ipsius violentia coactis, contra injustitiam ejus arramitum, locoque et die conducto paratum de more fuisset, utrisque ad postremum placuit pacifice rem finiri. Centum itaque solidos a nobis idem Girardus accepit, et XXti uxor ejus Adeladis cum liberis suis, per manum domni Odonis, nostri per id tempus prioris, ac sic quicquid propter Hilduciam illam quolibet modo, sive juste, sive injuste, reclamare poterant, solidum nobis et quietum perpetuo guerpiverunt. Petivit autem sepedictus Girardus ut sibi quicquid nobis foris fecerat ea de causa perdonaretur. Et perdonavit ei vice omnium nostrorum prior noster supradictus, et si non depredationes pauperum quod non poteramus, tamen injurias et damna nostra quantum perdonare possemus. Pro quo osculatus est ille Girardus manu ipsius, deinde revestitus est ab ipso de toto nostro deinceps benefacto.

Actum est hoc in Blesensi castro, in prato videlicet inter turrim et aulam comitis sito; anno ab incarnatione Domini Mo LXo VIIo, praesidente nobis anno IIIIo domno abbate Bartholomeo, mense junio, Testibus istis: Hugone preposito, Galterio Pane Parato, Rodulfo vicario Blesensi, Rotberto et Teduino filiis Teduini de Sancto Bricione, Guarino filio Gradulfi, Rainaldo vicario de Calvo Monte; de nostris: Isemberto monacho, Fulberto monacho, Michaele Rufo, Drogone monacho, Giraldo coquo, Fulberto de Orcasa.

Post haec, idem noster prior castrum petens Balgenciacum, datis ut suprataxatum est uxori Girardi XV solidis, et V totidem liberis suis singulis scilicet XII denariis, de nostro quoque benefacto revestivit, et ipsos atque guerpitionem suprascriptam ei quam Girardus ipse Blesi fecerat, annuendo fecerunt. Sed et hic testes hujus affuerunt: Hainricus de Balgentiaco, Alguinus levita, Bernardus famulus prioris, Guarnerius sacerdos, Bernerius, Teodericus Bastardus, Vivianus Nimium Habens Frumentum, Hugo monachus, Fulbertus famulus Hugonis, Guarinus sacerdos, Frotmundus de Memberolis. Nomina filiorum Girardi et Adeladis: Landricus, Hainricus, Gelduinus, Aiga, Marburgis.